



PENINGKATAN KES CURI DI BRUNEI DARUSSALAM: PUNCA DAN PENYELESAIANNYA ANALISIS AWAL DARI PERSPEKTIF AGENSI PERUNDANGAN

Abdurrahman Raden Aji Haqqi^{1, a}, Ahmad Masum^{2, b}, Cecep Soleh Kurniawan^{3, c}, Hjh. Mas Nooraini Hj Mohiddin^{4, d}, Hjh Hanan PD Hj Abdul Aziz^{5, e}, Supri Hj Sudin^{6, f}, Zurairatul Zakiah DSS Hj Rajid^{7, g}.

^{a, b, c, d, e, f, g} Fakulti Syariah dan Undang-Undang, Universiti Islam Sultan Sharif Ali (UNISSA), Brunei Darussalam

^aabdurrahman.haqqi@unissa.edu.bn, ^bahmad.masum@unissa.edu.bn, ^csoleh.kurniawan@unissa.edu.bn,
^dmasnooraini.mohiddin@unissa.edu.bn, ^ehanan.aziz@unissa.edu.bn, ^fsupri.hjsudin@unissa.edu.bn, ^gzurairatul.hrajid@unissa.edu.bn

Abstrak

Jenayah ialah produk sosial. Sifat dan ragamnya mencerminkan keadaan masyarakat. Dalam menangani jenayah, kita dapat lihat bagaimana sesebuah negara merumuskan polisi dan undang-undang mengikut keperluan semasa. Penyelidikan mengenai langkah menangani jenayah perlu dibumikan melalui gandingan tenaga merentasi sektor perkhidmatan. Kerjasama antara penguat kuasa, pengamal undang-undang dan penyelidik akademik perlu sentiasa dipertingkatkan. Perbuatan mencuri merupakan satu jenayah yang tidak dapat diterima oleh pelbagai peringkat dan lapisan masyarakat. Ini disebabkan oleh perbuatan mengambil barangan orang lain tanpa keizinan dan pengetahuannya merupakan satu bentuk jenayah berat. Perbuatan sedemikian merupakan satu aspek penganiayaan secara tidak langsung terhadap tenaga dan usaha orang lain. Segala penat lelah dan usaha untuk memperoleh sesuatu benda atau harta yang bermanfaat, akhirnya diambil tanpa keizinan oleh pihak lain dengan mudah. Kes-kes kecurian yang dilaporkan oleh media massa dari hari ke hari amat membimbangkan. Kes-kes ini melibatkan semua kalangan masyarakat tidak kira umur, jantina, mahupun berpendidikan. Jika diperhatikan berita-berita yang dilaporkan seperti di atas, maka jelaslah ada kalanya manusia hilang perikemanusiaan sehingga sanggup mengambil hak orang lain serta menganiayai orang lain. Objektif kajian ini adalah untuk mendedahkan dan mengenal pasti peranan agensi perundangan dalam menangani kes curi di Brunei Darussalam. Menerusi kajian perpustakaan dan lapangan dengan menemu bual pihak-pihak terbabit sama ada mahkamah, polis, penjara dan pelaku jenayah curi, kajian ini disiapkan dengan harapan peningkatan kes-kes curi di Brunei Darussalam akan dapat dicari punca dan cara penyelesaiannya agar jenayah curi dapat dihadkan kelajuannya.

Kata kunci: curi-agensi perundangan-punca-penyelesaian

1. Pendahuluan

Curi merupakan jenayah yang melibatkan perbuatan mengambil sesuatu tanpa izin atau pengetahuan pemilik secara sembunyi-sembunyi dan menyebabkan kehilangan harta benda milik orang lain. Kes curi merupakan kes yang tidak asing berlaku di Brunei Darussalam. Menurut *Brunei Statistical Year Book 2020* (2020:253), kadar kesalahan melibatkan harta benda telah mencapai sehingga 1819 kes. Sungguhpun angka ini menunjukkan penurunan berbanding statistik tahunan antara 2016 hingga 2019 adalah antara 2000-3000 kes secara purata (Zurairatul Z. Rajid, 2021), namun jumlah kes curi masih sahaja mencecah angka ribu.

Hari ini jenayah mencuri berlaku di mana-mana sahaja tanpa mengira waktu, bentuk, dan nilai harta. Antara harta yang banyak dicuri adalah barang-barang yang berharga seperti duit, barang kemas, telefon bimbit dan komputer riba sehinggalah kepada barang-barang yang besar seperti motosikal atau kereta. Malah pernah juga dilaporkan berlakunya kejadian mencuri kontena dan kayu balak, selain haiwan ternakan seperti lembu pun pernah dicuri yang disumbat ke dalam kereta. Dari sudut nilai harta pula, barang-barang yang dicuri tidak terhad kepada barang-barang berharga yang tinggi nilainya, bahkan barang-barang yang rendah nilainya juga tidak terkecuali seperti barang-barang elektrik, kenderaan dan barang-barang perhiasan rumah. Manakala dari sudut mangsa kes curi pula tidak terhad kepada harta benda persendirian, tetapi ia juga melibatkan kemudahan awam dan harta benda kerajaan seperti besi-besi penutup longkang di tepi-tepi jalan, kabel telekomunikasi, dawai elektrik, peralatan yang diperbuat dari logam seperti tembaga, besi dan seumpamanya. Dalam tempoh tiga tahun kebelakangan dari bulan Januari, 2018 sehingga Mac, 2021, Jabatan Perkhidmatan Elektrik telah mengalami sebanyak 57 kejadian kecurian dan pemugut, 9 darinya telah mengakibatkan gangguan bekalan kepada pengguna. (Khutbah Juma'at, Kementerian Hal Ehwal Ugama, Negara Brunei Darussalam).

Melihat kepada kepelbagaian bentuk ragam kes curi dan implikasinya terhadap jaminan harta, maka kajian ini bertujuan untuk membincangkan usaha para pelaksana perundangan curi dengan mengetengahkan proses pelaksanaan undang-undang tersebut berdasarkan peranan setiap pelaksana, mengetahui faktor berlaku kes dan peningkatannya, serta langkah dan usaha untuk meningkatkan kawalan berlakunya kes curi di Brunei Darussalam. Kajian ini dijalankan menggunakan metod kualitatif secara kepustakaan daripada sumber rujukan primer dan sekunder, serta temu bual melibatkan sebahagian para pelaksana perundangan seperti Jabatan Penjara, dan *Attorney General Chamber* (AGC), Brunei. Justeru, kajian ini akan dibahagikan kepada tiga bahagian utama iaitu pertama, Undang-undang curi di Brunei



Darussalam. Kajian ini kemudian akan menjelaskan peranan agensi perundangan di bahagian kedua, sebelum menjelaskan punca berlakunya kes curi dan cadangan penyelesaiannya pada bahagian terakhir.

2. Dapatan dan Perbincangan

Undang-Undang Curi di Brunei Darussalam

Sebelum membicarakan perihal undang-undang curi di Brunei Darussalam dengan lebih lanjut, kajian terlebih dahulu menjelaskan secara ringkas definisi kesalahan curi dan elemen pensabitan hukumannya secara ringkas. Curi menurut bahasa arab diambil dari perkataan *saraqa-yasriu-sariqatan*. Pakar bahasa menyetujui bahawa curi memberi maksud perbuatan mengambil sesuatu tanpa izin atau pengetahuan pemilik dan ianya dilakukan secara sembunyi-sembunyi (Kamus al-Miftāḥ. 2010, *The Dictionary; Arabic-English*. 2006. *al-Mu'jam al-Wasī*. 1972). Sebahagian mereka pula beranggapan bahawa perbuatan sembunyi bukan sahaja melibatkan tindakan menggerakkan sesuatu, tetapi juga meliputi perbuatan mendengar atau melihat secara curi-curi. Ibn Mandhūr (2005) misalnya mentakrifkan pencuri sebagai orang yang datang secara senyap-senyap menuju ke tempat simpanan (*hirz*) dan mengambil sesuatu daripada tempat itu. Curi menurut beliau menunjukkan maksud perbuatan yang dilakukan secara senyap atau sembunyi-sembunyi seperti perbuatan mencuri, atau curi-curi mendengar dan melihat.

Manakala kesalahan curi menurut undang-undang Brunei diselenggarakan di bawah dualisme perundangan iaitu undang-undang Syariah Brunei dan undang-undang sivil Brunei. Kesalahan curi di bawah bidang kuasa perundangan Syariah Brunei dikenali sebagai *sariqah* dan diperuntukkan di bawah Perintah Kanun Hukuman Jenayah Syariah, 2013 (PKHJJS, 2013) dalam bab 53. Kesalahan curi di bawah perundangan sivil Brunei pula diperuntukkan di bawah seksyen 378, Kanun Hukuman Jenayah, Penggal 22 (KHJ, Penggal 22) seperti dinyatakan di bawah:

Jadual 1: Curi menurut undang-undang Brunei Darussalam

Akta	Kesalahan	Peruntukan
Perintah Kanun Hukuman Jenayah Syariah, 2013	<i>sariqah</i>	53. “sariqah” bermakna suatu perbuatan memindah dengan cara sembunyi-sembunyi harta alih daripada <i>hirz</i> atau milikan tuan punyanya tanpa persetujuannya dan perbuatan itu dilakukan dengan niat hendak melucuthakkan harta itu daripada <i>hirz</i> atau milikan tuan punyanya.
Kanun Hukuman Jenayah, Penggal 22	curi	378. Barang siapa, yang bermaksud hendak mengambil secara tidak jujur apa-apa harta yang boleh dialih daripada milik mana-mana orang dengan tiada kerelaan orang itu, menggerakkan harta itu dengan tujuan hendak mengambilnya, adalah dikata melakukan kesalahan curi.

Kesalahan curi di bawah KHJ, Penggal 22 diletakkan di bawah Penggal 17: Kesalahan-kesalahan Terhadap Harta dalam seksyen 378 hingga 382 (Laws of Brunei, Chapter 22, 2016. Seksyen-seksyen ini memperuntukkan hal keadaan berkaitan dengan kesalahan curi, kejadian curi dan seksaan bagi kesalahan curi seperti dalam jadual 2 berikut:

Jadual 2: Peruntukan curi di bawah KHJ, Penggal 22

Bil.	Perkara	Seksyen
1	Curi	378
2	Hukuman curi	379
3	Mencuri di dalam rumah kediaman, dsb	380
4	Kerani atau pengkhidmat mencuri harta milik tuannya	381
5	Mencuri, selepas persediaan dibuat untuk menyebabkan kematian, cedera atau halangan supaya boleh dilakukan curi	382

(Sumber: KHJ, Penggal 22)



Bagi kesalahan curi yang disertai dengan kesalahan lain, ia tidak diletakkan di bawah kesalahan curi tetapi diklasifikasikan mengikut keseriusan kesalahan tersebut daripada ringan kepada berat dengan bentuk peruntukan yang berbeza-beza. Perkara sama turut berlaku pada mana-mana perbuatan salah yang menyerupai kesalahan curi seperti jadual 3 berikut:

Jadual 3: Peruntukan curi disertai kesalahan-kesalahan lain di bawah KHJ, Penggal 22

Bil.	Perkara	Seksyen
1	Pemerasan	384-389
2	Rompakan	392-402
3	Pecah amanah	406-409
4	Menerima harta curi	411-414
5	Khianat	426-440
6	Pencerobohan	447-462

(Sumber: KHJ, Penggal 22)

Kesalahan curi di bawah undang-undang Syariah Brunei melalui PKHJS, 2013 diklasifikasikan dalam bahagian IV: Kesalahan-kesalahan, Penggal I. Peruntukan-peruntukan *sariqah* terbahagi kepada sembilan bab disebut di dalam bab 53 hingga 61 merangkumi kesalahan-kesalahan yang boleh membawa hukuman *had* dan *ta'zir*. Peruntukan-peruntukan *sariqah* boleh dibahagikan kepada beberapa tajuk kecil seperti dalam jadual 4 berikut:

Jadual 4: Peruntukan *sariqah* di bawah PKHJS, 2013

Bil.	Perkara	Bab
1	<i>Sariqah</i> dan <i>hirz</i>	53
2	Kadar <i>nisab</i> bagi <i>sariqah</i>	54
3	Hukuman <i>sariqah</i>	55. (1) – 55. (3)
4	Bila hukuman <i>had</i> bagi kesalahan <i>sariqah</i> tidak boleh dikenakan	56
5	Harta dalam <i>hirz</i> yang berlainan	57
6	Hukuman kerana melakukan <i>qatl</i> atau mencederakan seseorang semasa melakukan <i>sariqah</i>	58
7	Percubaan melakukan <i>sariqah</i>	59
8	Subahat melakukan <i>sariqah</i>	60. (1) – 60. (2)
9	Pengembalian harta <i>sariqah</i>	61. (1) – 61. (2)

(Sumber: PKHJS, 2013)

Perbezaan antara kesalahan *sariqah* dan curi ialah kesalahan curi di bawah undang-undang Syariah Brunei dikenali sebagai *sariqah* dan pesalah curi boleh dikenakan hukuman *had* potong tangan atau *ta'zir* dalam bentuk hukuman penjara atau/dan denda. Manakala pesalah curi di bawah undang-undang sivil Brunei boleh dikenakan hukuman *ta'zir* dalam bentuk hukuman penjara, atau/dan denda, atau hukuman penjara, atau/dan sebatan. Kedua-dua bentuk kesalahan ini mempunyai elemen khusus sebagaimana disebutkan dalam jadual 1 di atas.



Peranan Agensi Perundangan Menangani Kes Curi di Brunei Darussalam

Beberapa agensi pelaksana perundangan telah diberi bidang kuasa tertentu untuk melaksanakan perundangan curi di Brunei Darussalam. Tugas dan tanggungjawab ini merangkumi tugas penyiasatan dan tangkapan, pengumpulan bukti dan pendakwaan, perbicaraan kes dan pemutusan hukuman kesalahan serta pelaksanaan hukuman ke atas pesalah. Aliran prosedur kesalahan-kesalahan ini meliputi proses siasatan, tangkapan, dan pengumpulan bukti oleh Polis DiRaja Brunei (PPDB) dan Bahagian Penguat kuasa Ugama (BPU). Kes curi kemudian akan diteliti Komiti A yang bertanggungjawab menilai hala tuju kes sama ada akan dibicarakan di bawah undang-undang Syariah Brunei atau undang-undang sivil Brunei. Sekiranya elemen-elemen kes curi menepati elemen kes *sariqah* di bawah PKHJS, 2013, maka Bahagian Pendakwaan Syariah akan mengambil alih bagi mengumpul pembuktian untuk pendakwaan sebelum dibicarakan di bawah Mahkamah Syariah yang akan menentukan hukuman tertuduh. Sebaliknya, jika elemen-elemen kes cenderung kepada kesalahan curi di bawah KHJ, Penggal 22, maka kes akan dibicarakan di bawah selenggaraan Bahagian Pendakwa raya (AGC), dan Mahkamah Sivil. Setiap kes curi yang sudah selesai dibicarakan akan diserahkan kepada Jabatan Penjara bagi pelaksanaan hukuman.

Bagi memudahkan para pelaksana menjalankan tugas masing-masing, sebahagian akta perundangan akan dirujuk merangkumi akta berhubung undang-undang prosedur, dan akta undang-undang substantif seperti Kanun Peraturan Jenayah, Penggal 7, dan Perintah Kanun Peraturan Jenayah Mahkamah Syariah, 2018, Perintah Keterangan Mahkamah Syariah, 2001, Akta Keterangan 108, PKHJS, 2013, dan KHJ, Penggal 22. Setiap agensi juga dipersiapkan dengan dokumen rasmi dalam bentuk SOP (*Standard Operation Procedure*). Proses pertama pengendalian kes melibatkan penyiasatan, penangkapan, dan pengumpulan bukti oleh PPDB dan BPU. PPDB menjalankan sebahagian besar tugas manakala BPU berperanan sebagai saksi keterangan yang memastikan keterangan diambil secara betul dan pengakuan yang dilakukan adalah secara sukarela sejajar dengan peruntukan bab 21, PKMS, 2001 yang menuntut kehadiran dua orang saksi adil. Kesalahan curi yang telah dikenal pasti mempunyai elemen-elemen *sariqah* PKHJS, 2013 akan dihadapkan kepada Jawatankuasa Peneliti yang dikenali sebagai *Assessment team* (Komiti A). Jawatankuasa ini secara ringkasnya adalah gabungan daripada empat agensi perundangan terdiri daripada PPDB, BPU, BPS, dan AGC bertanggung jawab mengesahkan sesuatu kesalahan mempunyai elemen-elemen *sariqah* yang boleh dibicarakan di bawah Mahkamah Syariah.

Mana-mana kes yang telah dipastikan mempunyai elemen *sariqah* PKHJS, 2013, maka ianya akan diserahkan kepada pihak BPS untuk proses pendakwaan. BPS melalui Unit Litigasi 1 akan melakukan siasatan lanjut dan pengumpulan bukti secara menyeluruh untuk memastikan kes boleh diteruskan dengan pendakwaan terhadap tertuduh dengan kesalahan *sariqah*. Kes *sariqah* yang telah selesai disiasat, dikumpulkan bukti dan dibangunkan pertuduhan ke atas tertuduh akan didaftarkan di bahagian Pendaftaran Kes Jenayah di Mahkamah Syariah untuk proses seterusnya iaitu perbicaraan kes. Ketika perbicaraan kes dijalankan, hakim akan meneliti fakta dan pembuktian yang ada selain mempertimbangkan faktor-faktor yang boleh mempengaruhi hukuman menjadi berat atau ringan di samping merujuk kaedah mempertimbangkan kes secara urutan tertentu seperti merujuk kitab suci al-Quran, Sunnah, Ijmak, Kata sepakat ulama mazhab, pendapat mazhab Shāfi'ī dan pendapat mazhab lain selama mana ia menepati fakta kes dan bersesuaian dengan kemaslahatan awam. Bagi kes yang belum pernah dibincangkan syara', maka hakim akan merujuk kes lampau yang dilihat menepati ketentuan syara'. Manakala bagi kes curi yang jelas tidak mengandungi elemen *sariqah* dalam PKHJS, 2013, misalnya kes-kes yang mempunyai peruntukan khusus dalam KHJ, Penggal 22, atau kes curi yang di dalamnya mengandungi peruntukan-peruntukan lain di bawah perundangan sivil seperti curi dalam talian, curi kad kredit dan sebagainya, akan dihadapkan terus kepada Timbalan Pendakwa Raya (AGC) untuk pendakwaan.

Bagi kes curi yang dibicarakan di bawah perundangan sivil pula, sebelum pertuduhan kesalahan curi disabitkan ke atas pesalah, pihak pendakwaan akan mengemukakan hujah berupa bukti jelas menunjukkan perbuatan kesalahan benar-benar berlaku berdasarkan bukti. Sebagai misal, jika pihak pendakwaan tidak dapat mengemukakan bukti bagi mensabitkan kesalahan pecah rumah dengan niat melakukan curi, maka Mahkamah akan mensabitkan tertuduh dengan kesalahan lebih rendah seperti kesalahan mencuri biasa sekiranya bukti menjelaskan hal tersebut. Untuk memudahkan pihak Mahkamah dalam melakukan penghakiman dan penentuan keputusan, Mahkamah merujuk kepada laporan kes terdahulu selain prinsip-prinsip am perundangan. Hal ini adalah disebabkan perundangan Sivil Brunei mengamalkan sistem *common law* yang berpegang kepada prinsip bahawa setiap apa yang pernah diputuskan hakim terdahulu, perlu dijadikan sandaran di mana hakim dalam meneliti kes baru hanya perlu merujuk dan tidak memerlukan pandangan baru daripada ahli akademik atau para penyelidik lain untuk membuat keputusan baru. Justeru, setiap kes yang dibicarakan akan dirujuk menggunakan laporan kes terdahulu selama mana perjalanan kes adalah selari dengan apa yang diputuskan seperti dalam kes terdahulu memandangkan perundangan sivil sudah berjalan dalam tempoh yang sangat lama dan kerana itu perundangan ini sudah mempunyai keputusan-keputusan penghakiman yang sudah mantap dan kukuh untuk dijadikan sandaran.

Jabatan Penjara pula bertanggung jawab melaksanakan perintah penahanan oleh mahkamah atau pihak berkuasa ke atas penghuni sehingga penghuni dibebaskan. Selain itu, jabatan ini juga memberi kawalan ke atas penghuni semasa mereka menjalani hukuman atau penahanan serta layanan yang bersesuaian di samping melaksanakan program pemulihan ke atas penghuni melalui pelbagai pendekatan serta program pendidikan dan kemahiran diri.



Setakat ini, pelaksanaan hukuman yang dijalankan bagi pesalah curi adalah terbatas kepada hukuman *ta'zīr* dalam bentuk denda, sebatan, atau pemenjaraan. Apabila mahkamah telah menjatuhkan hukuman, suatu waran yang antara lain menyatakan perintah mengurung pesalah di penjara akan diserahkan oleh pihak polis dengan segera kepada pegawai yang menjaga penjara. Pesalah-pesalah ini ditempatkan di salah satu daripada tiga institusi penjara mengikut tahap kesalahan yang mereka lakukan iaitu pertama: Institusi Penjara Jerudong. Pusat ini merupakan pusat penempatan bagi banduan lelaki, tahanan sementara (reman) atau banduan menjalani hukuman berulang kali. Kedua, Institusi Penjara Maraburong Fasa 1 dan fasa 3 yang menempatkan banduan lelaki bagi kemasukan pertama dan kedua yang dipindahkan dari penjara Jerudong. Manakala, Institusi Penjara wanita pula merupakan penempatan khusus bagi banduan wanita.

Punca dan penyelesaian

Dapatan temu bual bersama beberapa orang pegawai daripada Jabatan Penjara, dan *Attorney General Chamber* (AGC), sekitar Mei 2022, menyimpulkan bahawa punca-punca berlakunya kes kecurian adalah kurangnya didikan agama, pengaruh persekitaran, keluarga yang bermasalah, masalah pengangguran, terpengaruh dengan rakan khususnya penyalahgunaan dadah, dan ada juga yang mencuri hanya sekadar hiburan dan mencari kepuasan diri. Selain itu, beberapa agensi juga bersetuju mengatakan bahawa sebahagian besar faktor pesalah terlibat melakukan curi adalah disebabkan terdesak oleh kegawatan ekonomi sehingga mereka merasakan curi sebagai jalan paling mudah dan cepat untuk mendapatkan wang bagi membiayai kehidupan seharian mereka. Pada lazimnya, barang curian berbentuk material akan dijual untuk seorang pencuri mendapatkan wang tunai dan ini menyebabkan kesukaran mangsa curi untuk mendapatkan semula barang milik mereka dan mendapat kerugian. Desakan hidup ini juga mendorong pelaku untuk melakukan curi berkali-kali.

Para pegawai yang ditemu bual juga menyatakan punca pengulangan salah laku curi antaranya kebanyakan bekas pesalah curi terlalu sukar untuk mendapatkan pekerjaan tetap yang boleh menjamin kehidupan mereka lantaran stigma masyarakat menganggap mereka sebagai sampah masyarakat dan sukar untuk memberi peluang kedua kepada mereka. Hal ini semakin buruk, apabila sebahagian keluarga enggan menerima kembali bekas pesalah ke pangkuan mereka sehingga mendesak bekas pesalah mengulangi perbuatan curi dan seterusnya menjalani hukuman di penjara. Malahan, ada juga sebahagian pesalah mengakui bahawa mereka merasakan lebih dihargai dan di peduli ketika mereka meringkuk di dalam penjara. Jika perkara ini dibiarkan berterusan, setentunya akan membebankan negara kerana perlu mengeluarkan kos yang tinggi bagi proses pemulihan dan tahanan. Di samping itu, pengaruh dadah juga turut menyumbang sebagai punca pengulangan kes curi di mana bekas pesalah masih belum dapat mengawal sepenuhnya dari terjebak dengan kancan dadah dan bertindak melakukan curi untuk mendapatkan dadah. Selain daripada itu, para pegawai juga tidak menafikan adanya sebahagian kecil pesalah melakukan curi atas sebab untuk mendapatkan kepuasan diri, dan mendapatkan perhatian walaupun sebenarnya mereka dalam keadaan berkemampuan dari segi ekonomi.

Berbagai-bagai punca melakukan curi ini menggambarkan kecenderungan jenayah ini sebagai jenayah yang paling kerap berlaku bila mana dapatan kajian turut mendapati bahawa para agensi menerima aduan dan tangkapan hampir setiap hari. Walau bagaimanapun, agensi perundangan tidak kendur-kendur berusaha membendung jenayah ini daripada berleluasa. Salah satu usaha para agensi adalah melalui penambahan hukuman yang lebih berat seperti pewartaan PKHJS, 2013 yang boleh mengenakan hukuman had potong tangan jika sabit kesalahan, pengenaan hukuman yang lebih serius iaitu sebatan di samping kadar pemenjaraan lebih panjang bagi kesalahan curi melibatkan tempat terkawal dan tempat-tempat ibadat, dan kesalahan curi kabel yang telah mengakibatkan mangsa mengalami kerugian ribuan ringgit dan kesulitan kepada ramai orang.

Dari sudut pelaksanaan hukuman, Jabatan Penjara menjalankan program pemulihan dalam bentuk kerohanian dan psikologi di samping mendapat latihan kemahiran melalui pendekatan pendidikan fizikal dan vokasional. Usaha pemulihan bekas pesalah dikukuhkan lagi dengan pelaksanaan program hafazan khas semenjak bulan Januari 2021. Setakat ini seramai lima orang banduan sedang mengikuti program tersebut. Jabatan penjara juga membukakan kepada bekas banduan tempatan untuk mengikuti program *after-care* yang membantu bekas banduan mendapatkan pekerjaan melalui perniagaan dan perusahaan. Program ini sedikit sebanyak menyumbang sebagai faktor penurunan statistik kes residivist (pengulangan) antara tahun 2015 hingga 2018 iaitu 15.7% pada tahun 2015, 9.69% pada tahun 2016, dan 7.77% pada tahun 2018 (Zurairatul Z.Rajid. 2021).

Penutup

Jenayah curi menggugat keselamatan dan keamanan masyarakat melalui pengambilan harta benda secara tidak sah, sekali gus menyebabkan kerugian dan kehilangan hak milikan terhadap harta tersebut. Antara punca berlaku kes curi merangkumi kurang didikan agama, desakan hidup, stigma masyarakat enggan menerima semula bekas pencuri, pengaruh dadah, dan kepuasan diri. Negara Brunei Darussalam memandang serius terhadap isu kesalahan curi dan memberikan amanah terhadap agensi perundangan seperti pihak polis, pihak pendakwaan, mahkamah, dan jabatan Penjara untuk membanteras jenayah ini. Namun ini tidak bermakna, pihak lain terlepas daripada tanggungjawab ini



kerana kesalahan curi akan terus berleluasa sekiranya semua pihak tidak bersatu hati untuk menanganinya. Oleh itu, kajian mencadangkan keperluan Institusi Pengajian Tinggi untuk berkolaborasi bersama para agensi perundangan menggembelng idea, fikrah, dan tenaga untuk mendapatkan lagi kaedah-kaedah yang lebih wajar dan munasabah dalam mengawal dan membendung jenayah ini dari terus berleluasa seperti menyediakan lebih banyak program pendedahan kepada masyarakat tentang kepentingan memberi peluang kedua kepada bekas pesalah, dan mengkaji bentuk hukuman alternatif yang lebih efisien memberikan kesedaran terhadap pesalah curi. Dari sudut tanggungjawab masyarakat dan pertubuhan pula wajar untuk membantu bekas pesalah mendapatkan peluang pekerjaan, melalui bantuan-bantuan yang mudah diakses oleh mereka yang memerlukan kewangan.

Rujukan

Jabatan Perancangan Ekonomi dan Statistik. Jabatan Perangkan. (2021). Brunei Darussalam Statistical Year Book 2020. Bandar Seri Begawan: Dewan Bahasa dan Pustaka Brunei.

Kementerian Hal Ehwal Ugama. (2021). Membanteras Jenayah Curi dalam Khutbah 2 April 2021. Diakses pada 18 Ogos 2022. www.kheu.gov.bn

Mohd Khairi Zainuddin, Mohd Nazri Zainuddin & Mohd Fuad Mohd Isa. (2010). *Al-Miftah Kamus Moden Arab-Melayu-Inggeris*. Seremban: al-Azhar Media. Cetakan keempat.

Maktab al-Dirāsah al-Buhūs (pnyt.) (2006); *The Dictionary (Arabic-English)*. Beirut: Dār al-Kutub al-‘Ilmiyyah. Cetakan kedua.

Ibn Mandhūr, Jamāluddin Abī al-Fadhli Muḥammad bin Makram. (2005); *Lisān al-‘Arab*. Beirut: Dār al-Fikri.

Ibrāhim Unays et.al.(1972). *Al-Mu‘jam al-Wasīṭ*. Kāherah: t.tpt. Cetakan kedua

Zurairatul Z. Rajid (2021). Analisis Posedur Jenayah *Sariqah* Menurut Syariah dan Undang-undang di Negara Brunei Darussalam. Tesis Doktor Falsafah di Universiti Islam Sultan Sharif Ali Brunei.

Statut

Kanun Hukuman Jenayah, Penggal 22.

Perintah Kanun Hukuman Jenayah Syariah, 2013.

Temubual

DPP Dayang Hajah Siti Mu'izzah binti Haji Sabli, Bahagian Keadilan Jenayah, Pejabat Peguam Negara, 7 Mei 2022, pukul 2.30 Petang, Pejabat Peguam Negara.

Muhammad Izzat, Pegawai Penjara Jerudong dan Penjara Fasa 3, 16 Mei 2022, 2 petang, Penjara Maraburong, Fasa 1, Kampung Sungai Kelugas.

Puan Nur'Atikah binti Hj Ahmad, Ketua Bahagian Kerohanian dan Akhlak dan Ketua Bahagian Kebajikan dan Kesejahteraan, Institusi Penjara Wanita, 18 Mei 2022, pukul 8.3 pagi, Penjara Jerudong

Muhammad Izzat, Pegawai Penjara Jerudong dan Penjara Fasa 3, 19 Mei 2022, 9 pagi, Penjara Maraburong, Fasa 3, Kampung Sungai Kelugas.

eISSN 2948-5045

